

《讚阿彌陀佛偈》概要

《讚阿彌陀佛偈》是曇鸞大師的又一精絕之作，內容主要依據《無量壽經》，效仿龍樹菩薩《十二禮》及天親菩薩《願生偈》所寫的廣讚阿彌陀佛功德的讚歌。全篇由題號、歸敬、偈文（共 50 首）組成。

一、題號

題號「讚阿彌陀佛偈」，顯示五念門中讚歎門之意。然而看其正文，並不限於讚歎，而是總括五念門：每偈末句之「歸命禮」、「頂禮」、「稽首」、「頭面禮」等，為禮拜門；各偈讚歎阿彌陀佛及其淨土之德，為讚歎門；所隨讚歎而心中思惟佛德，為觀察門；偈中「我願往生歸命禮」、「故我頂禮願往生」是作願門；「迴施一切共往生」，是迴向門。

題乃總冠全篇，可知曇鸞大師以讚歎門為中心，總攝五念門。

二、歸敬

偈文之先，特別有示歸敬的「南無阿彌陀佛」六字，略有五義：

- （一）顯明通篇讚偈以佛名號為體，如同《往生論註》所說「以佛名號為經體」。
- （二）顯明此讚偈與淨土三經之一體性。
- （三）顯明讚歎即是稱名，以稱名一行總攝五念門行。
- （四）顯明稱名為略讚歎，如下的偈文為從一句名號所流出，是廣讚歎。
- （五）顯明偈文之佛、菩薩、國土三種功德莊嚴總攝於一句南無阿彌陀佛。

三、傍記


「南無阿彌陀佛」下，有「釋名無量壽，傍經奉讚亦曰安養」十三個字的傍記，簡略解釋題號。

「釋名無量壽」是解釋題中「阿彌陀佛」四字。阿彌陀佛乃是梵音，若釋以漢語，稱「無量壽（佛）」。

「傍經奉讚」是解釋題號首尾「讚偈」二字。「傍」是依據，說明此讚頌之偈文乃是依據經文所作。

「亦曰」是前釋完畢之補充。「安養」為安樂國土異名。「亦曰安養」是補充說明：此讚偈不僅讚正報阿彌陀佛，也讚依報安養國土；依正統一於阿彌陀佛名號。

四、偈文分科



五、讚偈大意

由題號及內文可知，此讚偈為敷演天親菩薩《往生論》讚歎門之義。

依序而言，「南無阿彌陀佛」對應論文「稱彼如來名」。第 2 至 14 偈對應「如彼如來光明智相」。第 2 至 46 偈對應「如彼名義」。第 49、50 偈對應「欲如實修行相應故」。

「彼如來光明智相」依《無量壽經》十二光名展開，第 2 偈總讚光壽之體，第 3 至 14 偈一一別讚光明智相。

「彼（如來）名義」用四十五首偈展開為佛莊嚴、菩薩莊嚴、國土莊嚴，以名即法故。又為顯明阿彌陀佛名號所具含的德義，除依經使用十二光名之外，大師另立二十五種德名如下：(1) 真實明；(2) 平等覺；(3) 難思議；(4) 畢竟依；(5) 大應供；(6) 大安慰；(7) 無等等；(8) 廣大會；(9) 大心海；(10) 無上尊；(11) 平等力；(12) 大心力；(13) 無稱佛；(14) 婆伽婆；(15) 講堂；(16) 清淨大攝受；(17) 不可思議尊；(18) 道場樹；(19) 真無量；(20) 清淨樂；(21) 本願功德聚；(22) 清淨薰；(23) 功德藏；(24) 無極尊；(25) 不可思議光。

「如實修行相應」展開為機法兩種深信，即：虛妄造業凡夫，憑自力只能無窮輪迴，不可能有如實修行；要想如實修行相應，必須「一心讚（彌陀）一佛」「歸阿

彌陀淨土」，蒙彌陀「慈光護念」，即得「如意無障礙」往生，乃至同於十方三世佛「同乘一如號正覺」。

六、其他要點

開篇首偈即說「我願往生歸命禮」，顯明此偈與天親菩薩《願生偈》同樣性質。

第 47、48 兩偈特別讚龍樹菩薩，顯明以龍樹菩薩為師，依易行道「歸阿彌陀生安樂」。顯然，曇鸞大師是承順著龍樹、天親二大菩薩之思想。

第 24 偈為解釋第十八願成就，末句「故我頂禮願往生」，這是其他各偈所沒有的，顯明乘第十八願之佛本願力往生為淨土門之體。

又，第 49 偈說明淨土門之菩提心為普願十方有緣共生安樂。第 50 偈說明十方三世諸佛淨土中唯讚彌陀一佛、唯歸阿彌陀淨土之理由。

本偈之原型，應只有最初之歸敬、傍記與偈文，每一偈前後「南無至心歸命禮西方阿彌陀佛」「願共諸眾生，往生安樂國」，第 14 偈之尾及卷末十行文等，似是後人仿效善導大師《往生禮讚》所附加。

讚阿彌陀佛偈

曇鸞大師 作

南無阿彌陀佛 釋名無量壽，傍經奉讚亦曰安養
南無至心歸命禮西方阿彌陀佛。

1. 現在西方去此界，十萬億刹安樂土，佛世尊號阿彌陀，我願往生歸命禮。

《聖教集》P75（《佛說無量壽經》）：

佛告阿難：「法藏菩薩今已成佛，現在西方，去此十萬億刹。
其佛世界，名曰安樂。」

《聖教集》P4（《佛說阿彌陀經》）：

爾時佛告長老舍利弗：

從是西方，過十萬億佛土，有世界名曰極樂。其土有佛，號阿彌陀，今現在說法。

願共諸眾生，往生安樂國。

南無至心歸命禮西方阿彌陀佛。

2. 成佛以來歷十劫，壽命方將無有量，法身光輪遍法界，照世盲冥故頂禮。

《聖教集》P75（《佛說無量壽經》）：

阿難又問：「其佛成道以來，為經幾時？」

佛言：「成佛以來，凡歷十劫。」

《聖教集》P66（《佛說無量壽經》）：

設我得佛，壽命有限量，下至百千億那由他劫者，不取正覺。

《聖教集》P78（《佛說無量壽經》）：

佛語阿難：「又，無量壽佛壽命長久，不可稱計，汝寧知乎？假使十方世界無量眾生皆得人身，悉令成就聲聞、緣覺，都共集會，禪思一心，竭其智力，於百千萬劫悉共推算，計其壽命長遠之數，不能窮盡，知其限極。」

《聖教集》P7（《佛說阿彌陀經》）：

又舍利弗，彼佛壽命及其人民，無量無邊阿僧祇劫，故名阿彌陀。

舍利弗，阿彌陀佛成佛以來，於今十劫。

《聖教集》P72（《佛說無量壽經》）

神力演大光，普照無際土，消除三垢冥，明濟眾厄難。

開彼智慧眼，滅此昏盲暗，閉塞諸惡道，通達善趣門

願共諸眾生，往生安樂國。
南無至心歸命禮西方阿彌陀佛。

3. 智慧光明不可量，故佛又號無量光。有量諸相蒙光曉，是故稽首真實明。

《聖教集》P66（《佛說無量壽經》）：

設我得佛，光明有限量，下至不照百千億那由他諸佛國者，不取正覺。

《聖教集》P77（《佛說無量壽經》）：

佛告阿難：「無量壽佛，威神光明最尊第一，諸佛光明所不能及。

或照百佛世界，或千佛世界，取要言之，乃照東方恆沙佛剎；南西北方四維上下亦復如是。或有佛光照於七尺，或一由旬、二三四五由旬，如是轉倍，乃至照一佛剎。

是故無量壽佛，號①無量光佛、②無邊光佛、③無礙光佛、④無對光佛、⑤炎王光佛、⑥清淨光佛、⑦歡喜光佛、⑧智慧光佛、⑨不斷光佛、⑩難思光佛、⑪無稱光佛、⑫超日月光佛。

願共諸眾生，往生安樂國。
南無至心歸命禮西方阿彌陀佛。

4. 解脫光輪無限齊，故佛又號無邊光。蒙光觸者離有無，是故稽首平等覺。

《聖教集》P64（《佛說無量壽經》）：

設我得佛，國有地獄、餓鬼、畜生者，不取正覺。

設我得佛，國中天人，壽終之後，復更三惡道者，不取正覺。

《聖教集》P78（《佛說無量壽經》）：

若在三塗極苦之處，見此光明，皆得休息，無復苦惱。壽終之後，皆蒙解脫。

願共諸眾生，往生安樂國。
南無至心歸命禮西方阿彌陀佛。

5. 光雲無礙如虛空，故佛又號無礙光。一切有礙蒙光澤，是故頂禮難思議。

《聖教集》P125（《佛說無量壽經》）：

佛告阿難：「汝起，更整衣服，合掌恭敬，禮無量壽佛。十方國土諸佛如來，常共稱揚讚歎彼佛無著無礙。」

《聖教集》P7（《佛說阿彌陀經》）：

舍利弗，彼佛光明無量，照十方國無所障礙，是故號為阿彌陀。

願共諸眾生，往生安樂國。
南無至心歸命禮西方阿彌陀佛。

6. 清淨光明無有對，故佛又號無對光。遇斯光者業繫除，是故稽首畢竟依。

《聖教集》P78（《佛說無量壽經》）：

其有眾生遇斯光者，三垢消滅，身意柔軟，歡喜踴躍，善心生焉。

《聖教集》P125-126（《佛說無量壽經》）：

佛告阿難：「汝起，更整衣服，合掌恭敬，禮無量壽佛。十方國土諸佛如來，常共稱揚讚歎彼佛無著無礙。」

於是阿難起整衣服，正身西面，恭敬合掌，五體投地，禮無量壽佛。白言：「世尊，願見彼佛安樂國土及諸菩薩、聲聞大眾。」

說是語已，即時無量壽佛放大光明，普照一切諸佛世界。金剛圍山、須彌山王、大小諸山，一切所有皆同一色。譬如劫水彌滿世界，其中萬物沉沒不現，澆養浩汗，唯見大水。彼佛光明亦復如是。聲聞、菩薩一切光明皆悉隱蔽，唯見佛光明耀顯赫。

願共諸眾生，往生安樂國。

南無至心歸命禮西方阿彌陀佛。

7. 佛光照耀最第一，故佛又號光炎王。三塗黑暗蒙光啟，是故頂禮大應供。

《聖教集》P78（《佛說無量壽經》）：

無量壽佛，光明顯赫，照曜十方，諸佛國土莫不聞焉。不但我今稱其光明，一切諸佛、聲聞、緣覺、諸菩薩眾咸共歎譽，亦復如是。

若有眾生，聞其光明威神功德，日夜稱說，至心不斷，隨意所願，得生其國。為諸菩薩、聲聞之眾所共歎譽，稱其功德。至其最後得佛道時，普為十方諸佛菩薩歎其光明，亦如今也。」

佛言：「我說無量壽佛，光明威神巍巍殊妙，晝夜一劫尚未能盡。」

《聖教集》P78（《佛說無量壽經》）：

若在三塗極苦之處，見此光明，皆得休息，無復苦惱。壽終之後，皆蒙解脫。

願共諸眾生，往生安樂國。

南無至心歸命禮西方阿彌陀佛。

8. 道光明朗色超絕，故佛又號清淨光。一蒙光照罪垢除，皆得解脫故頂禮。

《聖教集》P78（《佛說無量壽經》）：

其有眾生遇斯光者，三垢消滅，身意柔軟，歡喜踴躍，善心生焉。若在三塗極苦之處，見此光明，皆得休息，無復苦惱。壽終之後，皆蒙解脫。

願共諸眾生，往生安樂國。

南無至心歸命禮西方阿彌陀佛。

9. 慈光遐被施安樂，故佛又號歡喜光。光所至處得法喜，稽首頂禮大安慰。

《聖教集》P69（《佛說無量壽經》）：

設我得佛，十方無量不可思議諸佛世界眾生之類，蒙我光明觸其身者，身心柔軟，超過天人。若不爾者，不取正覺。

《聖教集》P78（《佛說無量壽經》）：

其有眾生遇斯光者，三垢消滅，身意柔軟，歡喜踴躍，善心生焉。

願共諸眾生，往生安樂國。

南無至心歸命禮西方阿彌陀佛。

10. 佛光能破無明暗，故佛又號智慧光。

一切諸佛三乘眾，咸共歎譽故稽首。

《聖教集》P78（《佛說無量壽經》）：

無量壽佛，光明顯赫，照曜十方，諸佛國土莫不聞焉。不但我今稱其光明，一切諸佛、聲聞、緣覺、諸菩薩眾咸共歎譽，亦復如是。

願共諸眾生，往生安樂國。

南無至心歸命禮西方阿彌陀佛。

11. 光明一切時普照，故佛又號不斷光。

聞光力故心不斷，皆得往生故頂禮。

《聖教集》P78（《佛說無量壽經》）：

無量壽佛，光明顯赫，照曜十方，諸佛國土莫不聞焉。

願共諸眾生，往生安樂國。

南無至心歸命禮西方阿彌陀佛。

12. 其光除佛莫能測，故佛又號難思光。

十方諸佛歎往生，稱其功德故稽首。

《聖教集》P91（《佛說無量壽經》）：

十方恆沙諸佛如來，皆共讚歎無量壽佛，威神功德不可思議。

願共諸眾生，往生安樂國。

南無至心歸命禮西方阿彌陀佛。

13. 神光離相不可名，故佛又號無稱光。
因光成佛光赫然，諸佛所歎故頂禮。

《聖教集》P77（《佛說無量壽經》）：
佛告阿難：「無量壽佛，威神光明最尊第一，諸佛光明所不能及。」

《聖教集》P125（《佛說無量壽經》）：
十方國土諸佛如來，常共稱揚讚歎彼佛無著無礙。

願共諸眾生，往生安樂國。
南無至心歸命禮西方阿彌陀佛。

14. 光明照耀過日月，故佛號超日月光。
釋迦佛歎尚不盡，故我稽首無等等。

《聖教集》P78（《佛說無量壽經》）：
佛言：「我說無量壽佛，光明威神巍巍殊妙，晝夜一劫尚未能盡。」

願共諸眾生，往生安樂國。
南無至心歸命禮西方阿彌陀佛。
哀愍護我，令法種增長。此世及後生，願佛常攝受。
願共諸眾生，往生安樂國。
南無至心歸命禮西方極樂世界觀世音菩薩。
願共諸眾生，往生安樂國。
南無至心歸命禮西方極樂世界大勢至菩薩。
願共諸眾生，往生安樂國。
南無至心歸命禮西方極樂世界諸菩薩清淨大海眾。
願共諸眾生，往生安樂國。
普為師僧、父母及善知識、法界眾生斷除三障，同得往生阿彌陀佛國，歸命懺悔。
南無至心歸命禮西方阿彌陀佛。

15. 阿彌陀佛初會眾，聲聞菩薩數無量，
神通巧妙不能算，是故稽首廣大會。

《聖教集》P79（《佛說無量壽經》）：
聲聞、菩薩、天人之眾，壽命長短亦復如是，非算數譬喻所能知也。又，聲聞、菩薩，其數難量，不可稱說；神智洞達，威力自在，能於掌中持一切世界。」
佛語阿難：「彼佛初會聲聞眾數不可稱計，菩薩亦然。如大目犍連百千萬億無量無數，於阿僧祇那由他劫，乃至滅度，悉共計校，不能究了多少之數。譬如大海，深廣無量。假使有人，析其一毛以為百分，以一分毛沾取一滴，於意云何？其所滴者，於彼大海，何所為多？」

阿難白佛：「彼所滴水，比於大海多少之量，非巧曆算數、言辭譬類所能知也。」

佛語阿難：「如目連等，於百千萬億那由他劫，計彼初會聲聞、菩薩，所知數者猶如一滴，其所不知如大海水。」

願共諸眾生，往生安樂國。

南無至心歸命禮西方阿彌陀佛。

**16. 安樂無量摩訶薩，咸當一生補佛處；
除其本願大弘誓，普欲度脫諸眾生。**

斯等寶林功德聚，一心合掌頭面禮。

《聖教集》P67（《佛說無量壽經》）：

設我得佛，他方佛土諸菩薩眾來生我國，究竟必至一生補處；除其本願自在所化，為眾生故被弘誓鎧，積累德本度脫一切，遊諸佛國修菩薩行，供養十方諸佛如來，開化恆沙無量眾生，使立無上正真之道。超出常倫諸地之行，現前修習普賢之德。若不爾者，不取正覺。

《聖教集》P97（《佛說無量壽經》）：

佛告阿難：「彼國菩薩，皆當究竟一生補處；除其本願，為眾生故，以弘誓功德而自莊嚴，普欲度脫一切眾生。」

願共諸眾生，往生安樂國。

南無至心歸命禮西方阿彌陀佛。

**17. 安樂國土諸聲聞，皆光一尋若流星。
菩薩光輪四千里，若秋滿月映紫金。
集佛法藏為眾生，故我頂禮大心海。**

《聖教集》P97（《佛說無量壽經》）：

阿難，彼佛國中，諸聲聞眾身光一尋，菩薩光明照百由旬。

願共諸眾生，往生安樂國。

南無至心歸命禮西方阿彌陀佛。

**18. 又觀世音大勢至，於諸聖眾最第一，
慈光照曜大千界，侍佛左右顯神儀。
度諸有緣不暫息，如大海潮不失時，
如是大悲大勢至，一心稽首頭面禮。**

《聖教集》P97（《佛說無量壽經》）：

有二菩薩最尊第一，威神光明普照三千大千世界。

阿難白佛：「彼二菩薩，其號云何」

佛言：「一名觀世音，二名大勢至。此二菩薩，於此國土修菩薩行，命終轉化，生彼佛國。」

願共諸眾生，往生安樂國。

南無至心歸命禮西方阿彌陀佛。

19. 其有眾生生安樂，悉具三十有二相，
智慧滿足入深法，究暢道要無障礙，
隨根利鈍成就忍，二忍乃至不可計，
宿命五通常自在，至佛不更雜惡趣，
除生他方五濁世，示現同如大牟尼。
生安樂國成大利，是故至心頭面禮。

《聖教集》P98（《佛說無量壽經》）：

阿難，其有眾生生彼國者，皆悉具足三十二相，智慧成滿，深入諸法，究暢要妙，神通無礙，諸根明利。其鈍根者，成就二忍；其利根者，得不可計無生法忍。

又彼菩薩，乃至成佛，不受惡趣，神通自在，常識宿命；除生他方五濁惡世，示現同彼，如我國也。

願共諸眾生，往生安樂國。

南無至心歸命禮西方阿彌陀佛。

20. 安樂菩薩承佛神，於一食頃詣十方，
不可算數佛世界，恭敬供養諸如來。
華香伎樂從念現，寶蓋幢幡隨意出，
珍奇絕世無能名，散華供養殊異寶。
化成華蓋光晃耀，香氣普熏莫不周，
華蓋小者四百里，乃有遍覆一佛界。
隨其前後次化去，是諸菩薩僉欣悅，
於虛空中奏天樂，雅讚德頌揚佛慧。
聽受經法供養已，未食之前騰虛還，
神力自在不可測，故我頂禮無上尊。

《聖教集》P98（《佛說無量壽經》）：

佛語阿難：「彼國菩薩，承佛威神，一食之頃，往詣十方無量世界，恭敬供養諸佛世尊。隨心所念，華香、伎樂、衣蓋、幢幡，無數無量供養之具，自然化生，應念即至。珍妙殊特，非世所有。輒以奉散諸佛及諸菩薩、聲聞之眾。在虛空中化成華蓋，光色昱爍，香氣普熏。其華周圓四百里者，如是轉倍，乃覆三千大千世界。隨其前後，以次化沒。」

其諸菩薩僉然欣悅，於虛空中共奏天樂，以微妙音歌歎佛德。聽受經法，歡喜無量。供養佛已，未食之前，忽然輕舉，還其本國。」

願共諸眾生，往生安樂國。

南無至心歸命禮西方阿彌陀佛。

21. 安樂佛國諸菩薩，夫可宣說隨智慧，
於己萬物亡我所，淨若蓮華不受塵，
往來進止若泛舟，利安為務捨適莫。
彼己猶空斷二想，燃智慧炬照長夜，
三明六通皆已足，菩薩萬行貫心眼。
如是功德無邊量，是故至心頭面禮。

《聖教集》P100（《佛說無量壽經》）：

佛語阿難：「生彼佛國諸菩薩等，所可講說，常宣正法，隨順智慧，無違無失。於其國土所有萬物，無我所心，無染著心。去來進止，情無所繫，隨意自在，無所適莫。無彼無我，無競無訟。

於諸眾生，得大慈悲饒益之心，柔潤調伏、無忿恨心，離蓋清淨、無厭怠心，等心，勝心，深心，定心，愛法、樂法、喜法之心，滅諸煩惱、離惡趣心。

究竟一切菩薩所行，具足成就無量功德。得深禪定，諸通明慧。遊志七覺，修心佛法。

肉眼清徹，靡不分了；天眼通達，無量無限；法眼觀察，究竟諸道；慧眼見真，能度彼岸；佛眼具足，覺了法性。

以無礙智，為人演說。等觀三界，空無所有。志求佛法，具諸辯才，除滅眾生煩惱之患。從如來生，解法如如。善知集滅音聲方便，不欣世語，樂在正論。

修諸善本，志崇佛道。知一切法皆悉寂滅，生身煩惱二餘俱盡，聞甚深法心不疑懼，常能修行。

其大悲者，深遠微妙，靡不覆載，究竟一乘，至於彼岸。決斷疑網，慧由心出，於佛教法，該羅無外。

智慧如大海，三昧如山王。慧光明淨，超踰日月。清白之法，具足圓滿。猶如雪山，照諸功德等一淨故；猶如大地，淨穢好惡無異心故；猶如淨水，洗除塵勞諸垢染故；猶如火王，燒滅一切煩惱薪故；猶如大風，行諸世界無障礙故；猶如虛空，於一切有無所著故；猶如蓮華，於諸世間無染污故。

猶如大乘，運載群萌出生死故；猶如重雲，震大法雷覺未覺故；猶如大雨，雨甘露法潤眾生故；如金剛山，眾魔外道不能動故；如梵天王，於諸善法最上首故；如尼拘類樹，普覆一切故；如優曇鉢華，稀有難遇故；如金翅鳥，威伏外道故；如眾遊禽，無所藏積故；猶如牛王，無能勝故；猶如象王，善調伏故；如獅子王，無所畏故；曠若虛空，大慈等故。

摧滅嫉心，不忌勝故。專樂求法，心無厭足。常欲廣說，志無疲倦。

擊法鼓，建法幢。曜慧日，除癡暗。

修六和敬，常行法施。志勇精進，心不退弱。為世燈明，最勝福田。常為師導，等無憎愛。唯樂正道，無餘欣戚。拔諸欲刺，以安群生。功慧殊勝，莫不尊敬。滅三垢障，遊諸神通。

因力、緣力、意力、願力、方便之力，常力、善力、定力、慧力、多聞之力，施戒忍辱精進禪定智慧之力，正念正觀諸通明力，如法調伏諸眾生力：如是等力，一切具足。

願共諸眾生，往生安樂國。

南無至心歸命禮西方阿彌陀佛。

**22. 安樂聲聞菩薩眾，人天智慧咸洞達，
身相莊嚴無殊異，但順他方故列名。
顏容端正無可比，精微妙軀非人天，
虛無之身無極體，是故頂禮平等力。**

《聖教集》P87（《佛說無量壽經》）：

其諸聲聞、菩薩、天人，智慧高明，神通洞達，咸同一類，形無異狀；但因順餘方，故有天人之名。顏貌端正，超世稀有，容色微妙，非天非人，皆受自然虛無之身、無極之體。

願共諸眾生，往生安樂國。

南無至心歸命禮西方阿彌陀佛。

**23. 敢能得生安樂國，皆悉住於正定聚，
邪定不定其國無，諸佛咸讚故頂禮。**

《聖教集》P65（《佛說無量壽經》）：

設我得佛，國中天人，不住定聚，必至滅度者，不取正覺。

《聖教集》P91（《佛說無量壽經》）：

佛告阿難：「其有眾生彼國者，皆悉住於正定之聚。所以者何？彼佛國中，無諸邪聚及不定聚。

十方恆沙諸佛如來，皆共讚歎無量壽佛，威神功德不可思議。」

願共諸眾生，往生安樂國。

南無至心歸命禮西方阿彌陀佛。

24. 諸聞阿彌陀德號，信心歡喜慶所聞，
乃暨一念至心者，迴向願生皆得往，
唯除五逆謗正法，故我頂禮願往生。

《聖教集》P66（《佛說無量壽經》）：

設我得佛，十方眾生，至心信樂，欲生我國，乃至十念，若不生者，不取正覺；
唯除五逆，誹謗正法。

《聖教集》P91（《佛說無量壽經》）：

諸有眾生，聞其名號，信心歡喜，乃至一念，至心迴向，願生彼國，即得往生，
住不退轉；唯除五逆，誹謗正法。

願共諸眾生，往生安樂國。

南無至心歸命禮西方阿彌陀佛。

25. 安樂菩薩聲聞輩，於此世界無比方，
釋迦無礙大辯才，設諸假令示少分。
最賤乞人並帝王，帝王復比金輪王，
如是輾轉至六天，次第相形皆如始。
以天色像喻於彼，千萬億倍非其類，
皆是法藏願力為，稽首頂禮大心力。

《聖教集》P88（《佛說無量壽經》）：

佛告阿難：「汝言是也！計如帝王，雖人中尊貴，形色端正，比之轉輪聖王，甚
為鄙陋，猶彼乞人在帝王邊也；轉輪聖王威相殊妙，天下第一，比之忉利天王，又復
醜惡，不得相喻萬億倍也；假今天帝比第六天王，百千億倍不相類也；設第六天王，
比無量壽佛國菩薩、聲聞，光顏容色不相及逮，百千萬億不可計倍。」

願共諸眾生，往生安樂國。

南無至心歸命禮西方阿彌陀佛。

26. 天人一切有所須，無不稱欲應念至，
一寶二寶無量寶，隨心化造受用具，
堂宇飲食悉如此，故我稽首無稱佛。

《聖教集》P89（《佛說無量壽經》）：

佛告阿難：「無量壽國，其諸天人衣服飲食、華香瓔珞、繒蓋幢幡、微妙音聲，
所居舍宅、宮殿樓閣，稱其形色，高下大小。或一寶二寶，乃至無量眾寶，隨意所欲，
應念即至。」

願共諸眾生，往生安樂國。
南無至心歸命禮西方阿彌陀佛。

27. 諸往生者悉具足，清淨色身無可比，
神通功德及宮殿，服飾莊嚴如六天。
應器寶鉢自然至，百味嘉餚倏已滿，
見色聞香意為食，忽然飽足受適悅。
所味清淨無所著，事已化去須復現，
晏安快樂次泥洹，是故至心頭面禮。

《聖教集》P86（《佛說無量壽經》）：

阿難，彼佛國土諸往生者，具足如是清淨色身、諸妙音聲、神通功德。所處宮殿、衣服、飲食、眾妙華香、莊嚴之具，猶第六天自然之物。

若欲食時，七寶鉢器自然在前：金、銀、琉璃、磲磔、瑪瑙、珊瑚、琥珀、明月、真珠，如是諸鉢，隨意而至。百味飲食，自然盈滿。雖有此食，實無食者，但見色聞香，意以為食，自然飽足。身心柔軟，無所味著。事已化去，時至復現。

彼佛國土，清淨安穩，微妙快樂，次於無為泥洹之道。

願共諸眾生，往生安樂國。
南無至心歸命禮西方阿彌陀佛。

28. 十方佛土菩薩眾，及諸比丘生安樂，
無量無數不可計，已生今生當亦然，
皆曾供養無量佛，攝取百千堅固法。
如是大士悉往生，是故頂禮阿彌陀。

《聖教集》P130（《佛說無量壽經》）：

佛告彌勒：「於此世界，有六十七億不退菩薩往生彼國。一一菩薩已曾供養無數諸佛，次如彌勒者也。

諸小行菩薩及修習少功德者，不可稱計，皆當往生。」

佛告彌勒：「不但我剎諸菩薩等往生彼國，他方佛土亦復如是。

其第一佛，名曰遠照，彼有百八十億菩薩，皆當往生。

其第二佛，名曰寶藏，彼有九十億菩薩，皆當往生。

其第三佛，名曰無量音，彼有二百二十億菩薩，皆當往生。

其第四佛，名曰甘露味，彼有二百五十億菩薩，皆當往生。

其第五佛，名曰龍勝，彼有十四億菩薩，皆當往生。

其第六佛，名曰勝力，彼有萬四千菩薩，皆當往生。

其第七佛，名曰師子，彼有五百億菩薩，皆當往生。

其第八佛，名曰離垢光，彼有八十億菩薩，皆當往生。

其第九佛，名曰德首，彼有六十億菩薩，皆當往生。

其第十佛，名曰妙德山，彼有六十億菩薩，皆當往生。

其第十一佛，名曰人王，彼有十億菩薩，皆當往生。

其第十二佛，名曰無上華，彼有無數不可稱計諸菩薩眾，皆不退轉，智慧勇猛，已曾供養無量諸佛，於七日中，即能攝取百千億劫大士所修堅固之法。斯等菩薩，皆當往生。

其第十三佛，名曰無畏，彼有七百九十億大菩薩眾，諸小菩薩及比丘等，不可稱計，皆當往生。」

佛語彌勒：「不但此十四佛國中諸菩薩等，當往生也；十方世界無量佛國，其往生者亦復如是，甚多無數。

我但說十方諸佛名號及菩薩、比丘生彼國者，晝夜一劫，尚未能盡，我今為汝，略說之耳。」

願共諸眾生，往生安樂國。

南無至心歸命禮西方阿彌陀佛。

**29. 若聞阿彌陀德號，歡喜讚仰心歸依，
下至一念得大利，則為具足功德寶。
設滿大千世界火，亦應直過聞佛名，
聞阿彌陀不復退，是故至心稽首禮。**

《聖教集》P133（《佛說無量壽經》）：

佛告彌勒：「其有得聞彼佛名號，歡喜踴躍乃至一念，當知此人為得大利，則是具足無上功德。

是故彌勒！設有大火，充滿三千大千世界，要當過此，聞是經法，歡喜信樂，受持讀誦，如說修行。

所以者何？多有菩薩，欲聞此經而不能得。

若有眾生，聞此經者，於無上道終不退轉。是故應當專心信受，持誦說行。

願共諸眾生，往生安樂國。

南無至心歸命禮西方阿彌陀佛。

**30. 神力無極阿彌陀，十方無量佛所歎。
東方恆沙諸佛國，菩薩無數悉往觀，
亦復供養安樂國，菩薩聲聞諸大眾。
聽受經法宣道化，自餘九方亦如是。
釋迦如來說偈頌，無量功德故頂禮。**

《聖教集》P94（《佛說無量壽經》）：

佛告阿難：「無量壽佛威神無極，十方世界無量無邊不可思議諸佛如來，莫不稱歎。

於彼東方恆沙佛國，無量無數諸菩薩眾，皆悉往詣無量壽佛所，恭敬供養，及諸菩薩、聲聞之眾；聽受經法，宣布道化。

南西北方四維上下亦復如是。」

爾時世尊而說頌曰：「

1 東方諸佛國，其數如恆沙，彼土菩薩眾，往觀無量覺。

2 南西北四維，上下亦復然，彼土菩薩眾，往觀無量覺。」

願共諸眾生，往生安樂國。

南無至心歸命禮西方阿彌陀佛。

31. 諸來無量菩薩眾，為植德本致虔恭，
或奏音樂歌歎佛，或頌佛慧照世間，
或以天華衣供養，或睹淨土興等願。
如是聖眾悉現前，蒙八梵聲授佛記，
一切菩薩增願行，故我頂禮婆伽婆。

《聖教集》P95（《佛說無量壽經》）：

3 一切諸菩薩，各齎天妙華，寶香無價衣，供養無量覺。

4 咸然奏天樂，暢發和雅音，歌歎最勝尊，供養無量覺。

5 究達神通慧，遊入深法門，具足功德藏，妙智無等倫。

6 慧日朗世間，消除生死雲，恭敬繞三匝，稽首無上尊。

7 見彼嚴淨土，微妙難思議，因發無量心，願我國亦然。

8 應時無量尊，動容發欣笑，口出無數光，遍照十方國。

9 迴光圍繞身，三匝從頂入，一切天人眾，踴躍皆歡喜。

10 大士觀世音，整服稽首問，白佛何緣笑，唯然願說意。

11 梵聲猶雷震，八音暢妙響，當授菩薩記，今說仁諦聽。

12 十方來正士，吾悉知彼願，志求嚴淨土，受決當作佛。

13 覺了一切法，猶如夢幻響，滿足諸妙願，必成如是剎。

14 知法如電影，究竟菩薩道，具諸功德本，受決當作佛。

15 通達諸法性，一切空無我，專求淨佛土，必成如是剎。

16 諸佛告菩薩，令觀安養佛，聞法樂受行，疾得清淨處。

17 至彼嚴淨國，便速得神通，必於無量尊，受記成等覺。

18 其佛本願力，聞名欲往生，皆悉到彼國，自致不退轉。

19 菩薩興至願，願已國無異，普念度一切，名顯滿十方。

20 奉事億如來，飛化遍諸剎，恭敬歡喜去，還到安養國。」

願共諸眾生，往生安樂國。

南無至心歸命禮西方阿彌陀佛。

32. 聖主世尊說法時，大眾雲集七寶堂，
聽佛開示咸悟入，歡喜充遍皆得道。
於時四面起清風，擊動寶樹出妙響，
和韻清徹過絲竹，踰於金石無倫比。
天華繽紛逐香風，自然供養常不息，
諸天復持天華香，百千伎樂用致敬。
如是功德三寶聚，故我運想禮講堂。

《聖教集》P99（《佛說無量壽經》）：

佛語阿難：「無量壽佛為諸聲聞、菩薩、天人頒宣法時，都悉集會七寶講堂，廣宣道教，演暢妙法，莫不歡喜，心解得道。

即時四方自然風起，吹七寶樹，出五音聲。無量妙華隨風四散，自然供養，如是不絕。

一切諸天皆齋天上百千華香、萬種伎樂，供養其佛及諸菩薩、聲聞之眾。普散華香，奏諸音樂。前後來往，更相開避。當斯之時，熙怡快樂，不可勝言。」

願共諸眾生，往生安樂國。
南無至心歸命禮西方阿彌陀佛。

33. 妙土廣大超數限，自然七寶所合成。
佛本願力莊嚴起，稽首清淨大攝受。

《聖教集》P76（《佛說無量壽經》）：

其佛國土，自然七寶——金、銀、琉璃、珊瑚、琥珀、磲磔、瑪瑙，合成為地，恢廓曠蕩，不可限極。

願共諸眾生，往生安樂國。
南無至心歸命禮西方阿彌陀佛。

34. 世界光曜妙殊絕，適悅宴安無四時，
自利利他力圓滿，歸命方便巧莊嚴。
寶地澄淨平如掌，無有山川陵谷阻，
若佛神力須則見，稽首不可思議尊。

《聖教集》P76（《佛說無量壽經》）：

悉相雜廁，轉相間入，光赫煜爍，微妙奇麗，清淨莊嚴，超踰十方一切世界，眾寶中精，其寶猶如第六天寶。又其國土，無須彌山及金剛圍、一切諸山，亦無大海、小海、溪渠、井谷；佛神力故，欲見則見。亦無地獄、餓鬼、畜生諸難之趣。亦無四時春秋冬夏，不寒不熱，常和調適。

願共諸眾生，往生安樂國。
南無至心歸命禮西方阿彌陀佛。

35. 道樹高四百萬里，周圍由旬有五十，
枝葉布二十萬，自然眾寶所合成。
月光摩尼海輪寶，眾寶之王而莊嚴，
周匝垂間寶瓔珞，百千萬種色變異。
光焰照耀超千日，無極寶網覆其上，
一切莊嚴隨應現，稽首頂禮道場樹。

《聖教集》P82（《佛說無量壽經》）：

又，無量壽佛，其道場樹高四百萬里，其本周圍五千由旬，枝葉四布二十萬里，一切眾寶自然合成，以月光摩尼持海輪寶——眾寶之王而莊嚴之。周匝條間，垂寶瓔珞，百千萬色，種種異變，無量光炎，照耀無極，珍妙寶網，羅覆其上。一切莊嚴，隨應而現。

願共諸眾生，往生安樂國。
南無至心歸命禮西方阿彌陀佛。

36. 微風吹樹出法音，普流十方諸佛刹。
聞斯音得深法忍，至成佛道不遭苦。
神力廣大不可量，稽首頂禮道場樹。

《聖教集》P83（《佛說無量壽經》）：

微風徐動，吹諸寶樹，演出無量妙法音聲。其聲流布，遍諸佛國。
聞其音者，得深法忍，住不退轉，至成佛道，耳根清徹，不遭苦患。

願共諸眾生，往生安樂國。
南無至心歸命禮西方阿彌陀佛。

37. 樹香樹色樹音聲，樹觸樹味及樹法，
六情遇者得法忍，故我頂禮道場樹。

《聖教集》P83（《佛說無量壽經》）

目睹其色，鼻知其香，口嘗其味，身觸其光，心以法緣，皆得甚深法忍，住不退轉，至成佛道，六根清徹，無諸惱患。

願共諸眾生，往生安樂國。
南無至心歸命禮西方阿彌陀佛。

38. 蒙道場樹對六根，乃至成佛根清徹。
音響柔順無生忍，隨力淺深咸得證。
此樹威德所由來，皆是如來五種力。
神力本願及滿足，明了堅固究竟願。
慈悲方便不可稱，歸命稽首真無量。

《聖教集》P83（《佛說無量壽經》）：

至成佛道，六根清徹，無諸惱患。

阿難，若彼國土天人，見此樹者，得三法忍：

一者音響忍；

二者柔順忍；

三者無生法忍。

此皆無量壽佛威神力故，本願力故，滿足願故，明了願故，堅固願故，究竟願故。

願共諸眾生，往生安樂國。

南無至心歸命禮西方阿彌陀佛。

39. 從世帝王至六天，音樂轉妙有八重，
輾轉勝前億萬倍，寶樹音麗倍亦然。
復有自然妙伎樂，法音清和悅心神，
哀婉雅亮超十方，故我稽首清淨樂。

《聖教集》P84（《佛說無量壽經》）：

佛告阿難：「世間帝王，有百千音樂。自轉輪聖王乃至第六天上，伎樂音聲輾轉相勝千億萬倍。第六天上萬種樂音，不如無量壽國諸七寶樹一種音聲千億倍也。

亦有自然萬種伎樂。又其樂聲，無非法音，清暢哀亮，微妙和雅，十方世界音聲之中最為第一。

願共諸眾生，往生安樂國。

南無至心歸命禮西方阿彌陀佛。

40. 七寶樹林周世界，光耀鮮明相映發。
華果枝葉更互為，稽首本願功德聚。

41. 清風時時吹寶樹，出五音聲宮商和。
微妙雅曲自然成，故我頂禮清淨薰。

《聖教集》P80（《佛說無量壽經》）；

又其國土，七寶諸樹周滿世界。金樹、銀樹、琉璃樹、玻璃樹、珊瑚樹、瑪瑙樹、碑磔樹。

或有二寶、三寶，乃至七寶，轉共合成。

或有金樹，銀葉華果。或有銀樹，金葉華果。

或琉璃樹，玻璃為葉，華果亦然。

或水精樹，琉璃為葉，華果亦然。

或珊瑚樹，瑪瑙為葉，華果亦然。

或瑪瑙樹，琉璃為葉，華果亦然。

或碑磔樹，眾寶為葉，華果亦然。

或有寶樹，紫金為本，白銀為莖，琉璃為枝，水精為條，珊瑚為葉，瑪瑙為華，碑磔為實。

或有寶樹，白銀為本，琉璃為莖，水精為枝，珊瑚為條，瑪瑙為葉，碑磔為華，紫金為實。

或有寶樹，琉璃為本，水精為莖，珊瑚為枝，瑪瑙為條，碑磔為葉，紫金為華，白銀為實。

或有寶樹，水精為本，珊瑚為莖，瑪瑙為枝，碑磔為條，紫金為葉，白銀為華，琉璃為實。

或有寶樹，珊瑚為本，瑪瑙為莖，碑磔為枝，紫金為條，白銀為葉，琉璃為華，水精為實。

或有寶樹，瑪瑙為本，碑磔為莖，紫金為枝，白銀為條，琉璃為葉，水精為華，珊瑚為實。

或有寶樹，碑磔為本，紫金為莖，白銀為枝，琉璃為條，水精為葉，珊瑚為華，瑪瑙為實。

行行相值，莖莖相望；枝枝相准，葉葉相向；華華相順，實實相當。

榮色光曜，不可勝視。清風時發，出五音聲，微妙宮商，自然相和。

願共諸眾生，往生安樂國。

南無至心歸命禮西方阿彌陀佛。

42. 其土廣大無崖際，眾寶羅網遍覆上，
金縷珠璣奇異珍，不可名寶為校飾。
周匝四面垂寶鈴，調風吹動出妙法。
和雅德香常流布，聞者塵勞習不起。
此風觸身受快樂，如比丘得滅盡定。
風吹散華滿佛土，隨色次第不雜亂，
華質柔軟烈芬芳，足履其上下四指，
隨舉足時還如故，用訖地開沒無遺，
隨其時節華六返，不可議報故頂禮。

《聖教集》P89（《佛說無量壽經》）：

無量寶網彌覆佛土，皆以金縷真珠、百千雜寶、奇妙珍異莊嚴校飾。周匝四面，垂以寶鈴，光色晃曜，盡極嚴麗。

自然德風，徐起微動，其風調和，不寒不暑，溫涼柔軟，不遲不疾。吹諸羅網及眾寶樹，演發無量微妙法音，流布萬種溫雅德香。其有聞者，塵勞垢習自然不起。風觸其身，皆得快樂，譬如比丘得滅盡三昧。

又，風吹散華，遍滿佛土，隨色次第，而不雜亂，柔軟光澤，馨香芬烈。足履其上，踏下四寸；隨舉足已，還復如故。華用已訖，地輒開裂，以次化沒，清淨無遺。隨其時節，風吹散華，如是六反。

願共諸眾生，往生安樂國。

南無至心歸命禮西方阿彌陀佛。

43. 眾寶蓮華盈世界，一一華百千億葉；
其華光明色無量，朱紫紅綠間五色，
煒燁煥爛曜日光，是故一心稽首禮。

《聖教集》P90（《佛說無量壽經》）：

又，眾寶蓮華，周滿世界。一一寶華，百千億葉。其華光明，無量種色，青色青光，白色白光，玄黃朱紫，光色赫然，煒燁煥爛，明曜日月。

願共諸眾生，往生安樂國。

南無至心歸命禮西方阿彌陀佛。

44. 一一華中所出光，三十六百有千億；
一一光中有佛身，多少亦如所出光；
佛身相好如金山，一一又放百千光。
普為十方說妙法，各安眾生於佛道。
如是神力無邊量，故我歸命阿彌陀。

《聖教集》P90（《佛說無量壽經》）：

一一華中，出三十六百千億光；一一光中，出三十六百千億佛，身色紫金，相好殊特；一一諸佛，又放百千光明，普為十方說微妙法。如是諸佛，各各安立無量眾生於佛正道。

願共諸眾生，往生安樂國。

南無至心歸命禮西方阿彌陀佛。

45. 樓閣殿堂非工造，七寶雕綺化所成。
明月珠璫交露幔，各有浴池形相稱。
八功德水滿池中，色味香潔如甘露。
黃金池者白銀沙，七寶池沙互如此。
池岸香樹垂布上，栴檀芬馥常流馨。

天華璀璨為映飾，水上熠耀若景雲。
無漏依果難思議，是故稽首功德藏。

《聖教集》P84（《佛說無量壽經》）：

其講堂、精舍、宮殿、樓觀，皆七寶莊嚴，自然化成。復以真珠、明月摩尼眾寶以為交絡，覆蓋其上。

內外左右，有諸浴池，或十由旬，或二十、三十，乃至百千由旬，縱廣深淺，皆各一等。八功德水，湛然盈滿，清淨香潔，味如甘露。

黃金池者，底白銀沙。白銀池者，底黃金沙。水精池者，底琉璃沙。琉璃池者，底水精沙。珊瑚池者，底琥珀沙。琥珀池者，底珊瑚沙。磤磤池者，底瑪瑙沙。瑪瑙池者，底磤磤沙。白玉池者，底紫金沙。紫金池者，底白玉沙。或有二寶、三寶，乃至七寶，轉共合成。

其池岸上，有栴檀樹，華葉垂布，香氣普熏。天優鉢羅華、鉢曇摩華、拘牟頭華、芬陀利華，雜色光茂，彌覆水上。

願共諸眾生，往生安樂國。

南無至心歸命禮西方阿彌陀佛。

46. 菩薩聲聞入寶池，隨意淺深如所欲。
若須灌身自然注，欲令旋復水尋還。
調和冷暖無不稱，神開體悅蕩心垢。
清明澄潔若無形，寶沙映徹如不深。
澹淡迴轉相注灌，淅約容豫和人神。
微波無量出妙響，隨其所應聞法語。
或聞三寶之妙章，或聞寂靜空無我，
或聞無量波羅蜜，力不共法諸通慧，
或聞無作無生忍，乃至甘露灌頂法。
隨根性欲皆歡喜，順三寶相真實義。
菩薩聲聞所行道，於是一切悉具聞。
三塗苦難名永閉，但有自然快樂音。
是故其國號安樂，頭面頂禮無極尊。

《聖教集》P85（《佛說無量壽經》）：

彼諸菩薩及聲聞眾，若入寶池，意欲令水沒足，水即沒足；欲令至膝，即至於膝；欲令至腰，水即至腰；欲令至頸，水即至頸；欲令灌身，自然灌身；欲令還復，水輒還復。調和冷暖，自然隨意，開神悅體，蕩除心垢。清明澄潔，淨若無形，寶沙映徹，無深不照。微瀾迴流，轉相灌注，安詳徐逝，不遲不疾。

波揚無量自然妙聲，隨其所應，莫不聞者。或聞佛聲，或聞法聲，或聞僧聲；或寂靜聲、空無我聲、大慈悲聲、波羅蜜聲；或十力、無畏、不共法聲，諸通慧聲、無所作聲、不起滅聲、無生忍聲，乃至甘露灌頂眾妙法聲；如是等聲，稱其所聞，歡喜無量。

隨順清淨、離欲、寂滅、真實之義，隨順三寶、力、無所畏、不共之法，隨順通慧菩薩、聲聞所行之道。無有三塗苦難之名，但有自然快樂之音，是故其國名曰安樂。

願共諸眾生，往生安樂國。

南無至心歸命禮西方阿彌陀佛。

47. 本師龍樹摩訶薩，誕形像始理頹綱。
關閉邪扇開正轍，是閻浮提一切眼。
伏承尊語歡喜地，歸阿彌陀生安樂。

願共諸眾生，往生安樂國。

南無至心歸命禮西方阿彌陀佛。

48. 譬如龍動雲必隨，閻浮提放百卉舒。
南無慈悲龍樹尊，至心歸命頭面禮。

願共諸眾生，往生安樂國。

南無至心歸命禮西方阿彌陀佛。

48. 我從無始循三界，為虛妄輪所迴轉。
一念一時所造業，足繫六道滯三塗。
唯願慈光護念我，令我不失菩提心。
我讚佛慧功德音，願聞十方諸有緣。
欲得往生安樂者，普皆如意無障礙。
所有功德若大少，迴施一切共往生。
南無不可思議光，一心歸命稽首禮。

願共諸眾生，往生安樂國。

南無至心歸命禮西方阿彌陀佛。

49. 十方三世無量慧，同乘一如號正覺。
二智圓滿道平等，攝化隨緣故若干。
我歸阿彌陀淨土，即是歸命諸佛國。
我以一心讚一佛，願遍十方無礙人。
如是十方無量佛，咸各至心頭面禮。

願共諸眾生，往生安樂國。

南無至心歸命禮西方阿彌陀佛。

哀愍覆護我，令法種增長。此世及後生，願佛常攝受。
願共諸眾生，往生安樂國。

南無至心歸命禮西方極樂世界觀世音菩薩。
願共諸眾生，往生安樂國。

南無至心歸命禮西方極樂世界大勢至菩薩。
願共諸眾生，往生安樂國。

南無至心歸命禮西方極樂世界諸菩薩清淨大海眾。
願共諸眾生，往生安樂國。

普為師僧、父母及善知識、法界眾生斷除三障，同得往生阿彌陀佛國，歸命懺悔。

讚阿彌陀佛偈

讚一百九十五 禮五十一拜